

Partenaris activs per proteger viandants

Ura da dumondas al parlament chantunal

■ (anr/fa) **Vatgas-mamma pon esser privlusas, quai mussan las novas da viandants che vegnan attatgads da quels animals. La regenza ha tranter auter era prendi posiziun davart la discussiun areguard l'olimpiada 2026.** A la fin da fanadur è disgraziada ina dunna da 77 onns suenter l'attatga da vatgas-mamma sin la pastgira da Laax. La senda uffiziala traversava ina muntanera da questas vatgas che sa chattavan sin in pastg circumdà d'ina saiv. «Per evitar da quests accidents stuessan a mes avis tut las sendas passar sper ils pastgs cun vatgas-mamma e na tras quels», ha ditg deputà *Franz Sepp Caluori* (pcd, Cuir) e menziunà che la vischnanca da Laax haja fatg quai immediatamain. «Il viandar e far gitas en muntogna è fitg apprezia, gist per il Grischun sco chantun turistic èsi da grond'impurtanza ch'ils giasts possian far lur spassegiadas senza il privel da questas attatgas», ha'l cuntinuà e dumandà tge ch'il Chantun fetschia per impedir en avegnir da quests accidents.

Cun agid da tavlas, racumandaziuns e fegls d'infurmaziun

«Directivas impegnativas per ils possessurs d'animals per proteger ils umans da las vatgas-mamma nun existan, perquai nun èsi per il chantun betg pussaivel da decretar reglas u directivas liantas u decider mesiras», ha respundì cusseglier guvernativ *Jon Domenic Parolini*, «tuttina nun è nagin restà inactiv. Ins ha publicità numerusas recumandaziuns e fegls volants che sa drizzan a purs, persunal d'alp, vischnancas, viandants e bikers sco era mess si tavlas d'avertiment.» Questa lavur che ha la finamira da render attent al privel vegn fatga cuminaivlamain da differents partenaris. I sa tracta qua p.ex. dal Plantahof, da las uniuns purilas grischuna e svizra, da las cuminanze per sendas chantunalas e naziunalas, dal post da consultaziun chantunal per la prevenziun d'accidents en l'agricultura u era da las organizaziuns turisticas. «En vista a la proxima stagiun d'alp vegnan quests partenaris ensemen cun ulteriurs acturs a prender sut egl schliaziun pussaivlas per minimar il privel sin las alps», ha ditg Parolini.



Vatgas-mamma ed olimpiada èn stads tema en l'ura da dumondas.

MAD

Center per requirents d'asil renitents en Grischun?

«Sco ch'ins ha legì il fanadur en pliras gasetas quotidianas èsi previs presumadamain d'avrir insanua en Grischun in center per requirents d'asil renitents», ha ditg *Jan Koch* (pps, Tschintg Vitgs) e dumandà tge che la regenza dia da quai. Cusseglier guvernativ *Christian Rathgeb* ha menziunà che la regenza na sappia nagut da quest intent da la confederaziun: «Nus savain unicamain ch'i vegnan tshertgades en plirs chantuns lieus per uschenumnads 'Test-Betriebe für Besondere'.» La regenza fiss, sco ch'el ha ditg, sceptica areguard avrir in da quels centers en Grischun: «Quel fiss mo realisabel, sche la confederaziun elavouress ensemen cun chantun e vischnanca pertutgada in concept da gestiun pratitgabel e sorprendess tut ils custs. Enpli duess vegnir reduci en Grischun il dumber da requirents d'asil correspondentamain, da maniera che nus stuessan renunziar a la gestiun d'in center da transit.» Rathgeb ha menziunà che la Confederaziun haja infurmà la regenza grischuna ch'ins evalueschia plirs lieus pussaivels per in tal 'Test-Betrieb', tranter quels lieus è era Landquart: «La gestiun d'in tal center vegniss tolerà da la regenza be, sche la vischnanca gess daperina cun quai.»

«Regenza respecta decisiun davart l'olimpiada»

Da l'onn 2013 aveva la populaziun dal Grischun ditg na dad ina candidatura per ils gieus olimpics d'enviern 2022. *Mario Salis* (pps, Engiadin'Ota) ha dumandà a la regenza sia posiziun areguard ina discussiun davart l'olimpiada 2026. «La regenza è fitg averta per la discussiun davart gieus olimpics en Svizra e surtut en Grischun, cun ina buna candidatura e realisaziun da gieus olimpics pudess la Svizra e'l Grischun rinforzar sia reputaziun sco osp, sco organisatur da gronds arrandschaments e sco destinaziun attractiva per sport d'enviern», ha ditg cusseglier guvernativ Parolini. Ina candidatura per l'olimpiada 2026 fiss tenor el in project da generaziun naziunal. «Sche e cun qualas premissas ina realisaziun en Grischun fiss pussaivla, stuessan ins en mintga cas examinar profundamain», ha ditg *Jon Domenic Parolini* e punctuà che la regenza respecta la decisiun dal pievel dal 2013, ch'ella na saja perquai betg daventada sezza activa. «Il sustegn da projects concrets examiness la regenza spert e profundamain. Per pudair candidar per l'onn 2026 stuessan eventuals iniziants daventar dentant fitg spert activs», ha el manegia.